

ZAKON O VANJSKOTRGOVINSKOJ POLITICI

("Službeni glasnik Bosne i Hercegovine", broj 7/98 i 35/04)

IZVOD

Zakonom o Vanjskotrgovinskoj politici regulisani su osnovni elementi sistema za izvoz i uvoz roba i usluga i određeni uslovi za izvršavanje ekonomskih djelatnosti u inozemstvu i za izvršavanje ekonomskih djelatnosti od strane fizičkih i pravnih lica u Bosni i Hercegovini.

Ovim zakonom su utvrđena i pravila koja proizilaze iz trgovinskih sporazuma za vanrednu primjenu zaštitnih mjera i za zaštitu domaćeg tržišta od međunarodne nepravedne konkurencije kao što su damping i subvencije.

Donošenje unilateralnih mjera u vezi sa vanjskom trgovinom i sporazumi sa trećim zemljama u oblasti vanjske trgovine su nadležnosti institucija BiH, a vanjskotrgovinsku politiku utvrđuju organi BiH sa nadležnim organima Entiteta.

Izvoz i uvoz roba je slobodan od bilo kakvih ograničenja ili drugih mjera istog efekta, ali se ne isključuju zabrane ili ograničenja međunarodnog prometa opravdane na temelju javnosti, morala, javne politike ili javne sigurnosti i dr.

Izvoz i uvoz roba će se osigurati pod istim uslovima na čitavoj teritoriji BiH. Uvezena roba je podložna istim poreskim i zakonskim uvjetima kao za istu ili sličnu robu proizvedenu u BiH. Vijeće ministara propisuje obim ili vrijednost kvota, način, vremenski period i uvjete za njihovu klasifikaciju.

Ministarstvo vanjske trgovine i ekonomskih odnosa BiH osigurava potreban broj bilateralnih i multilateralnih dozvola, kvota, kontingenata, detašmana i sl. za potrebe privrede BiH. Raspodjela se vrši na Entitete, a ovi na krajnje korisnike.

Roba koja se uvozi mora biti u skladu sa standardima i tehničkim i kvalitativnim normama kako bi se stavila u promet.

Ako ugovori sa stranim pravnim licima, propisi stranih zemalja ili međunarodni ugovori predviđaju da se uz robu koja se izvozi ili uvozi moraju priložiti potvrde ili ovjereni dokumenti takvi dokumenti se izdaju ili ovjeravaju od strane nadležnih organa. Državne vlasti koje ovjeravaju ove potvrde ili dokumente u našoj zemlji su Ministarstvo vanjske trgovine BiH i to sa potpisom i suhim žigom, a ministarstva Entiteta mokrim žigom i potpisom.

Promet roba koje predstavljaju ulaganje kapitala od strane stranog pravnog i fizičkog lica ili povećanje uloga kapitala, osim roba čiji je uvoz podložan posebnim ograničenjima, je slobodan ako je u skladu sa pravnim poslom na temelju kojeg se vrši ulaganje.

Preduzeća iz Bosne i Hercegovine koja ulažu kapital ili izvode investicione radove u inozemstvu mogu uvesti opremu i rezervne dijelove kupljene i korištene u izvršenju tih radova, a uz dokaz o kupovini potrebno je prezentirati knjigovodstveni dokaz da su ove robe bile korištene u izvršenju investicionih i projekata ulaganja kapitala u inozemstvu.

Zamjena prethodno izvezenih ili uvezenih roba, privremeni izvoz i uvoz roba i režimi za izvoz i uvoz roba iz slobodnih zona i u slobodne zone, su regulisani članovima od 12. do 16. ovog zakona.

Preduzeće može primiti sprave, mjerne instrumente i sredstva, službena vozila i opremu koju mu je poslalo strano pravno lice s kojim je potpisan ugovor o komisionu, konsignacijskom skladištu ili uslugama u svrhu pružanja usluga u okviru zaključenog ugovora, u skladu sa carinskim propisima.

Dugoročna proizvodna saradnja je dugoročni ugovorni odnos u trajanju od najmanje tri godine između domaćeg pravnog lica koje obavlja proizvodne aktivnosti u BiH i stranog pravnog lica, koji se tiče razvoja, uvođenja proizvodnje, proizvodnje i uzajamnog snabdijevanja proizvodima i njihovim sastavnim dijelovima.

Ukoliko je takav ugovor podložan kvoti ili dozvoli, Ministarstvo vanjske trgovine BiH i resorna ministarstva oba Entiteta daju odobrenje koje važi onoliko koliko je ugovor na snazi.

Vrijednost izvezenih roba mora biti najmanje jednaka vrijednosti roba uvezenih na osnovu tog istog ugovora.

Preduzeće može privremeno izvoziti ili uvoziti opremu pod zakupom za korištenje u proizvodnji i za obavljanje usluga. Entiteti izdaju dozvole za privremeni izvoz ili uvoz zakupljene robe.

Preduzeće može zaključivati ugovore o izvozu roba i usluga koje se plaćaju uvozom roba i usluga.

Usluge se mogu slobodno pružati u okviru teritorije BiH, a Vijeće ministara može propisati da se međunarodna trgovina određenim uslugama može vršiti u skladu sa posebnim uslovima.

Usluge stranih fizičkih i pravnih lica u BiH podliježu oporezivanju i propisima pod istim uslovima kao iste ili slične usluge domaćih fizičkih i pravnih lica.

Izvoz i uvoz usluga bez naknade odobravaju resorna ministarstva Entiteta u skladu sa propisanim uslovima koje utvrđuje Vijeće ministara, a na prijedlog Ministarstva vanjske trgovine BiH. . i

Ministarstvo trgovine Entiteta, prema uslovima koje propisuje Vijeće ministara BiH, daje dozvolu domaćim pravnim licima za korištenje sredstava za ulaganja u osnivanje preduzeća u stranoj zemlji. Ove odredbe se odnose i na osnivanje predstavništava, poslovnih jedinica, kao i obavljanje bankarskih i finansijskih poslova, osiguranja i reosiguranja.

Aspekti prava intelektualne svojine vezani za vanjsku trgovinu, kao i međunarodni sporazumi su u nadležnosti institucija BiH.

Vijeće ministara BiH propisuje primjenu zaštitnih mjera u ograničenom periodu, kada prijeti opasnost ozbiljne povrede domaće proizvodnje.

Vijeće ministara BiH propisuje definicije, uslove i procedure antidampinške istrage, te mjere i rokove antidampinške zaštite.

Postupak u smislu utvrđivanja postojanja doppinga se pokreće na osnovu pismenog zahtjeva pravnog lica ili udruženja koji djeluju u ime privrede BiH, a smatraće se da je zahtjev podnesen ukoliko ga podrže oni proizvođači čiji obim proizvodnje istih ili sličnih proizvoda i usluga iznosi više od 50% ukupne proizvodnje istog ili sličnog proizvoda ili usluga u BiH.

Privremene mjere mogu biti uvedene na šest mjeseci i produžene na još tri mjeseca.

Odredbe članova od 34. do 38. se primjenjuju i na subvencionirani uvoz.

Kontrolu nad primjenom ovog zakona vrši Ministarstvo vanjske trgovine, koje prilikom predlaganja podzakonskih akata i drugih propisa Vijeću ministara BiH je obavezno pribaviti mišljenja nadležnih organa Entiteta i po potrebi asocijacija privrede.

-Ovaj zakon je stupio na snagu 19. maja 1998. godine i primjenjuje se na sve postupke pokrenute nakon ovog datuma

- Izmjene ovog Zakona su stupile na snagu 24. jula 2004.